

Minister Mike Eman:

Exigencia di Aruba ta pa Citgo ta e prome 'Green Refinery' di nos hemisferio

ORANJESTAD – Durante e anuncio di reapertura di e refineria realisa siman pasa, Minister President Mike Eman a resalta tambe un punto hopi importante den henter e acuerdo logra cu e compania Citgo. Ta trata di un sistema riba cual e refineria lo funciona a base di gas y e emision di carbon, cu normalmente ta sali di e refineria, ta wordo captura y uza den e cultivo di alga cu na su luga ta bira un recurso renobabel util den diferente uzo. E condicion aki di parti di Gabinete Mike Eman ta pone cu e planta di Citgo na Aruba lo bira e prome 'Green Refinery' di nos hemisferio y ta reafirma e posicion di vanguardia cu Aruba tin riba tereno di sostenibilidad.

Premier Eman a bisa cu e contract cu Citgo ta inclui condicionnan hopi detaya

mara na e reapertura di e refineria.

Un di e exigencianan di parti di Aruba cu tabata importante y no negociabel tabata uzo di gas pa opera e refineria. Esey kiermen cu e refineria ta bay den operacion cu suministro di gas for di Venezuela cu ta yega Aruba den e subsuelo di lama. Esaki ta algo cu e compania Mericano, ya caba a bay di acuerdo y ta den plan pa ehecuta.

E planta na Aruba ta bira e prome proyecto di 'carbon capture' na nivel industrial. "Si e logra na Aruba, no solamente pa Aruba lo ta algo grandi, pero henter mundo cu ta mirando Aruba caba como pais liderando riba tereno di sostenibilidad y buscando pa yega na 100% di energia for di fuente renobabel," asina Minister President Eman a splica. Adicionalmente ta reduci e huma cu nos tabata conoce ta sali di e refineria.



Aruba por bira ehempel di un di e opcionnan mas grandi cu tin pa bay reduci carbon cu ta sali for di cualkier industria cu ta emiti carbon.

Gabinete Mike Eman ta kere cu e combinacion aki di un

industria cu pa hopi decada ta importante den economia di e isla, awo tambe por cuadra cu e liña di pensamiento 'green' y asina haya 'the best of both worlds.' Pa e motibo aki Prome Minister Mike Eman ta sinti su mes

hopi satisfecho y orguyoso pa e estupendo trabou haci di parti di e grupo negociado lidera pa Minister di Energia Ing. Mike de Meza, como tambe Director di Gabinete, Sr. Richard Arends. □